

每週經課朗誦經文(巴克禮台語漢字)2013/09/29

共同經課 - 1 耶利米書三十二章一節～三 a 節，六節～十五節

1 猶大王西底家第十年，就是尼布甲尼撒十八年，有耶和華的話臨到耶利米。2 彼時，巴比倫王的軍隊圍困耶路撒冷，先知耶利米關佇拘留所的院，佇猶大王的厝；3 因為猶大王西底家已經將伊關禁，講：「你啥事讖語講，耶和華按呢講：『看啊，我欲將此個城交佇巴比倫王的手，伊欲取伊。6 耶利米講：「耶和華的話臨到我講：7 『看啊，你的叔沙龍的子合拿篋欲來見你，講：我佇亞拿突彼區田，請你買伊；因為贖回的權在佇你，你通買。』」8 我的叔的子哈拿篋果然照耶和華的話來拘留所的院尋我，對我講：「我佇便雅憫的境內，亞拿突彼區田，請你買；因為承接及贖回的權在佇你。你著買做你的！」我就知這是耶和華的話。9 我就對我的叔的子哈拿篋買亞拿突彼區田，秤彼個價銀互伊，共十七舍客勒。10 我佇契面簽名，將契封密，閣請人來做知見，亦用天秤秤銀互伊。11 我就提照規例所立的買契，就是封密的彼張，及無封的彼張，12 當我的叔的子哈拿篋及簽名佇契面諸個知見，以及坐佇拘留院內一切猶大人的面前，將買賣的契交互瑪西雅的孫尼利亞的子巴錄。13 當 in 面前，我吩咐巴錄講：14 「萬軍的耶和華——以色列的上帝按呢講：著將封密的及無封的此二張契收佇磁器的內面，通留存多多日。15 因為萬軍的耶和華——以色列的上帝按呢講：將來佇此所在人欲閣買厝宅、田園，及葡萄園。」

共同經課 - 2 詩篇九十一篇一節～六節，十四節～十六節

1 踮佇至高者隱密的所在者，彼個人欲倚起佇全能者的蔭影。2 論到耶和華我欲講：伊是我逃閃的所在，是我的山寨，是我的上帝，我所倚靠者。3 因為伊欲救你脫離當鳥仔的羅網及毒害的瘟疫。4 伊欲用伊的翅股伏你；你欲匿佇伊的翅下；伊的誠實是大細的盾牌。5 你毋免驚暝間的驚惶，抑是日時啲飛的箭。6 亦免驚黑暗中流行的瘟疫，抑是日中晝滅無人的毒症。14 因為伊真疼我，我就欲救伊；因為伊識我的名，我就欲安置伊佇高的所在。15 伊求叫我，我就欲應伊；伊佇危急的時，我欲及伊佇啲；我欲救伊，互伊尊貴。16 我欲用長歲壽互伊滿足，互伊看見我的救恩。

共同經課 - 3 提摩太前書六章六節～十九節

6 若是敬虔兼知足就是大利路；7 因為咱出世無帶甚麼來，過世也袂會帶甚麼去。8 若有通食穿，咱就欲知足。9 獨獨許個想欲發財的，就陷落迷惑及羅網以及多多戇戇有損害的私慾，就是互人沈落佇敗壞及滅無的。10 因為貪財是萬惡的根源。有人戀慕伊，就受迷惑來離開道理，用多多艱苦家己刺鑿。11 獨獨你屬上帝的人啊，著閃避諸個，來追趕義、敬虔、信、仁愛、吞悞、溫柔。12 著爭戰信的好爭戰，將永活擒住住。你的受召就是為著此個，你也曾承認好的志願佇多多干證的人的面前。13 我佇賞賜活命互萬項有的上帝的面前，以及對本丟彼拉多做好的干證的基督耶穌的面前，吩咐你：14 著守此個命令，無瑕疵，無通嫌，到咱的主耶穌基督的顯現。15 到期，大福氣、獨一有權能萬王的王、萬主的主，欲顯明伊，16 就是獨一袂死，惦佇袂通近倚的光，人所未曾看見、也袂會看見的，願尊貴及永遠的權勢歸佇伊。阿們！17 今世好額的人你著吩咐 in，心志莫得自高，莫得下 in 的向望佇無定著的錢財；著下佇將萬物滿滿互咱享受的上帝。18 閣吩咐 in 行好事，好額佇好所行，歡喜賑濟，甘願分互人，19 為著家己積聚好的地基，備辦後來的事，互 in 擒住真的活命。

共同經課 - 4 路加福音十六章十九節～三十一節

19 「有一個富人穿紫色及幼苧布的衣裳，逐日奢華宴樂。20 閣有一個乞食，名拉撒路，遍身生疼，21 人下伊佇富人的大門口，愛將富人桌腳所磕落的來度飽，狗也來舐伊生疼的位。22 喪鄉人死，互天使扶伊到亞伯拉罕的胸前。富人也死，續埋葬。23 佇陰間痛苦的中間，抬目遠遠看見亞伯拉罕，閣拉撒路佇伊的胸前，24 就叫講：『我的祖亞伯拉罕啊，可憐我！差拉撒路用指頭仔尾搵水來涼我的舌；因為我佇此火焰中，真悽慘。』25 若是亞伯拉罕講：『子啊，著記得你在生享受你的福氣，拉撒路受著艱苦；今伊佇遮得著安慰，也你受悽慘。26 毋若按呢，佇阮及恁的中間，有大深淵隔啲，致到欲對遮過去恁遐袂會；對遐過來阮遮也袂會。』27 伊就講：『既然按呢，求祖你差拉撒路去阮父的厝；28 因為我有五個兄弟，互伊對 in 做干證，免得 in 也到此個痛苦的所在。』29 亞伯拉罕講：『in 有摩西及許個先知通聽 in。』30 應講：『我的祖亞伯拉罕啊，袂啦，若有人對死人中去尋 in，in 就欲反悔。』31 亞伯拉罕給伊講：『in 若毋聽摩西及先知，就有人對死人中復活，in 也毋受苦勸。』」